







皇明四夷考序

四夷何以首安南也我郡縣也次兀  
 衛也哈密女直非歟羈縻之虜非我  
 哈之有三衛以靖難歟非也大寧之  
 盖自洪武始也其南據大寧也乃自  
 復交趾而收大寧乎都統之議夷且強我革蘭台  
 以駸駸乎我貳矣棄哈密而撫女直乎哈密罷我  
 河西女直扞我遼東也土番入哈密而嘉峪不驚  
 胡虜通女直而山海弗靖矣朝鮮何以次兀良哈  
 也知禮教也大國也琉球小夷何以次朝鮮也學





于中國也何以終韃靼也非就寇乎我勝國也盛  
衰之運中國有安危焉以故別考而存之戰守之  
畧可幾而得矣 高皇何以有海外之使也更始  
也 成祖西洋之艤不已勞乎鄭和之泛海與胡  
濙之頒書也國有大疑焉爾羌三王胡四王我厘  
厘焉西番五王世優之何也不能爲我深創也苟  
因俗而治之得相安焉可矣西域何以不得浮南  
海也王公設險假樹渠焉如之何使其縱橫出入  
幾徧宇內也海島之夷勤我封使往來之禮歟夷  
不言往來往來言諸侯也四夷來王八蠻通道未  
聞有報使焉然則領封可乎奚爲而不可也陪臣  
請命于京師王人致命于海上非往來乎嗚呼均  
覆載者天德也辨華夷者王道也昔也外夷入中  
華今也華人入外夷也喜寧田小兒宋素卿莫登  
瀛皆我華人雲中閩浙憂未艾也是故慎封守者  
非直禦外侮亦以固內防也池魚故淵飛鳥舊林  
人情獨不然乎彼其忍於捐墳墓父母妻子鄉井  
而從異類者必有大不得已也嗚呼德惟善政政  
在養民盍亦反其本矣不然而欲郡縣我子弟武  
衛我干城烏可得哉



嘉靖甲子三月朔日鄭曉識

皇明四夷考目錄

上卷

安南

兀良哈

朝鮮

琉球

女直

三佛齊

占城

日本

真臘

暹羅

蘇門答刺

瓜哇

下卷

古俚

淳泥

滿刺加

榜葛刺

錫蘭山

蘇祿

柯枝

祖法兒

溜山

皇明四夷考

陳



南泥里 黎伐 哈密

赤斤蒙古 安定阿端 曲先

罕東 撒馬兒罕 天方

迭里 渴石 養夷

達失干 卜花兒 土魯番

黑婁 鹽澤 哈烈

默德那 俺都淮 八刺黑

于闐 火州 別失八里

魯陳 沙鹿海牙 賽藍

哈失哈力 亦力把力 阿丹

白葛達 呵哇 瑣里

西洋瑣里 彭亨 百花

婆羅 阿魯 小葛蘭

拂菻 古里班卒 呂宋

合猫里 碟里 打回

日羅夏治 忽魯母恩 忽魯謨斯

甘巴里 麻林 古麻刺

沼納樸兒 加異勒 吃力麻兒

失刺思 納失者罕 亦思把罕甘

白松虎兒 答兒密 淡巴



其把里 黑葛達 敏真誠

八答黑商 覽邦 火刺札

討來思 阿速 沙哈魯

西番 韃靼

皇明四夷考目錄終

皇明四夷考上卷

吾學編第

海鹽鄭曉

皇明祖訓曰四方諸夷皆限山隔海僻在一隅得

其地不足以供賦得其民不足以供役若其自不

揣量來擾我邊則彼為不祥彼既不為中國患而

我興兵輕伐亦不祥也吾恐後世子孫倚中國富

彊貪一時戰功無故興兵致傷人命切記不可但

胡戎與西北邊境互相密邇累世戰爭必選將練

兵時謹備之不征諸夷東北朝鮮

即高麗其李仁人及子成桂今正東偏北日本

名且者自洪武六年至二十八年首尾凡弒王氏四王姑待之雖



實詐暗通奸臣胡惟庸謀為不軌故絕之  
臣之子皆入太學讀書禮待甚厚  
正南偏東大琉球朝貢不時王子及陪  
小琉球不通往來  
西南安南三年  
占城自占城以下諸國朝時內帶行  
暹羅朝貢如常濱海  
占城自占城以下諸國朝時內帶行  
蘇門答刺濱海  
西洋  
瓜哇濱海  
彭亨居海  
百花居海  
三佛齊居海  
淳泥居海  
中居海

洪武四年九月 上御奉天門諭省府臺臣曰海外夷國為患中國者不得不討不為中國患者不可輒用兵古人言地廣非久安之計民勞乃易變之源隋煬帝妄興師旅征討琉球荼毒生民徒慕

虛名疲中土載諸史冊為後世譏朕以諸小蠻夷阻越山海不侵中國無煩用兵惟西北胡戎世為中國患不可不謹備卿等記此言知朕意

洪武十五年命翰林侍講火原潔等編類華夷譯語 上以前元素無文字發號施令但借高昌書製蒙古字行天下乃命原潔與編修馬懿赤黑等以華言譯其語凡天文地理人事物類服食器用靡不具載復取元秘史參考以切其字諧其聲音既成刊布自是使臣往來朔漠皆能得其情凡四夷分十八所設通事六十人大通事有都督



都指揮等官統諸小通事總理貢夷降夷及歸正人夷情番字文書譯審奏聞

永樂七年遣太監鄭和王景弘侯顯率官兵三萬下西洋凡西洋功次卽非斬首選法不得減革十三年吏部員外郎陳誠上使西域記凡十七國

### 安南

安南唐虞時南交也秦爲象郡漢爲南越所據武帝平南越置交趾九真日南三郡朱梁時始上豪曲承美者據之已而并于劉隱未幾管内大亂衆推豪酋丁部爲州帥部子璉繼立宋旣平嶺表璉

遂內附黎桓篡丁氏李公蘊又篡黎氏陳日暉又篡李氏宋以遠夷故置不問相繼皆封爲交趾郡王元朝兼有華夷至憲宗遣將破其國而日暉竄居海島弱不能支始歸附元封其子光昺爲安南國王光昺死子日烜自立元發兵破之日烜卒子日燇遣使朝貢元末天下大亂安南不至明興削平羣盜驅逐胡元洪武元年登極詔諭薄海內外日燇大懼又聞征南將軍廖永忠副將軍朱亮祖帥師逾嶺降何真定廣東西日燇欲納款又以梁王尚在雲南持兩端二年始遣其少中大夫同時



敏正大夫段悌黎安世等來朝貢請封遣侍讀學士張以寧典簿牛諒封日燿爲安南國王賜駝紐塗金銀印以寧等至安南界日燿已卒其弟日燿嗣立遣阮汝亮迎請誥印以寧等不從日燿遣杜舜欽等請命于朝以寧駐安南候命詔封日燿爲王是年遣翰林編修羅復仁兵部主事張福詔諭安南占城國王各罷兵息民皆聽命三年日燿卒封其子曰鑑嗣王五年陳叔明遣人朝貢却不受明年又遣人納貢謝罪請封當是時燁嗣王叔明者燁兄也專國政十二年燁遣使來貢 上惡其

疆悍數侵占城詔諭叔明二十年燁遣使貢賀聖壽二十一年國相黎季犛廢其主燁幽大陽坊尋弒燁立叔明子曰焜主國事二十二年又弒日焜假燁名遣人來貢二十六年遣禮部尚書任亨太監察御史嚴震直諭令出兵討龍州趙宗壽二十七年遣人朝貢却不受二十九年遣行人陳誠呂讓諭令還思明伍縣不聽陳氏傳十二世至日焜而黎氏篡立僭稱皇帝國號大虞紀元天聖永樂初季犛上表竄姓名爲胡一元子蒼易名奎詐稱陳氏絕奎爲陳氏甥求權署國事朝廷從其請逾



年陳王孫添平走至京言季犛弒篡季犛詐上表  
請迎添平歸還以國 上遣行人聶聰送添平歸  
國勅征南副將軍黃中呂毅率兵禦之季犛伏兵  
芹站殺添平及我使人 上怒永樂四年七月辛  
卯以成國公能爲征夷將軍總兵官西平侯晟新  
城侯輔左右副將軍豐城侯彬雲陽伯旭左右叅  
將大將軍率右副將軍右叅將及清遠伯友統神  
機將軍程寬朱貴遊擊將軍毛八丹朱廣王恕等  
橫海將軍魯麟王玉商鵬鷹揚將軍呂毅朱吳江  
浩方政驃騎將軍朱榮金銘吳旺劉塔等二十五

將軍以兩京畿荆湖閩浙廣東西兵出廣西憑祥  
左副將軍左叅將統都指揮陳睿盧旺等以巴蜀  
建昌雲貴兵出雲南蒙自兵部尚書劉儁叅贊戎  
務尚書黃福大理寺卿陳洽轉餉是日上幸龍江  
禡祭誓衆曰黎賊父子必獲無赦脅從必釋毋養  
亂毋玩寇毋毀廬墓毋害稼穡毋恣取貨財毋掠  
人妻女毋殺降有一於此雖功不宥毋冒險肆行  
毋貪利輕進罪人旣得卽擇立陳氏子孫賢者撫  
治一方班師告廟揚功名於無窮其往勉之時晟  
鎮雲南先遣彬以征夷副將軍印制授晟十月輔



兵度坡壘關傳檄數黎賊二十罪遂入雞陵關晟  
兵至白鶴江賊拒守富良江能卒以輔爲征夷將  
軍代能十二月勅行人朱勸諭黎賊晟兵奪宣江  
進次沱江輔兵渡沱江合兵渡富良江進克多邦  
城焚賊西都賊走入海輔駐兵交州晟追賊至木  
九江五年正月輔晟合兵破籌江柵賊走悶海口  
敗之富良江五月賊走又安都督僉事柳升率舟  
師追賊敗之得賊船三百賊遁且入海輔晟乘勝  
追之升引兵出奇羅海口賊敗卒王柴胡等七人  
擒李犖李保等十人擒其子澄安南人武如卿等

僞大虞皇帝蒼僞太子芮僞將相王侯柱國黎季  
貌等詔求陳氏後復立爲安南國王國人言黎賊  
殘陳氏無後乃郡縣其地立交趾布政使司都指  
揮使司按察司分十七府曰交州北江諒江三江  
建平新安建昌奉化清化宣化大原鎮蠻諒山新  
平又安順化升華四十七州一百五十七縣衛十  
一所三市船司一改鷄陵關爲鎮夷關安撫人民  
三百二十萬獲蠻人二百八萬七千五百糧儲一  
千三百六十萬石象馬牛十二萬五千九百船八  
千七百軍器二千五十三萬九千勅黃尚書兼掌



布按二司事勅輔晟雋交趾應有懷才抱德山林  
隱逸明經能文博學有才賢良方正孝悌力田聰  
明正直廉能幹濟練達吏事精通書算明習兵法  
武藝智謀容貌魁偉語言便利膂力勇敢陰陽術  
數藥醫方技之人悉心訪求禮送京師擢用九月  
輔遣升露布獻俘季犛蒼及偽將相下獄赦澄芮  
等令有司衣食之陞柴胡等指揮使僉事千戶是  
冬贈故安南國王陳氏子孫七人官六年七月進  
封輔爲英國公晟黔國公封升安遠伯八月交人  
簡定鄧悉反以晟爲征夷將軍帥師討之雋仍叅

贊十二月晟與賊簡定戰於生厥江敗績雋都督  
呂毅交趾叅政劉昱皆沒七年二月勅輔總兵討  
賊言晟出師失律致賊猖獗今聞鄧悉死而八百  
媳婦老媪猶供饋者何人賊云有象五萬又謂我  
將帥皆易與宜戒慎同心協力早滅此賊五月簡  
定稱上皇立陳季擴爲大越皇帝改元重光八月  
輔敗賊于鹹子關九月又敗之太平海口十月季  
擴稱故王後請封輔不聽進兵至清化十一月輔  
獲簡定及其偽將相八年正月召輔還令晟節制  
諸軍簡定檻至京伏誅十二月季擴人上表請降



遣方通政諭季擴以爲交趾右布政使又以其黨  
陳原樽爲叅政胡具澄景異鄧鎔都指揮潘季祐  
按察副使是月季擴景異復反九年正月以輔爲  
征虜副將軍總兵會征夷將軍晟率師討之二月  
詔赦交趾七月輔晟敗賊于月常江十一月輔率  
舟師破賊于海上十年八月又破賊于神授海口  
十月又破賊西心江十一年十二月輔晟會兵敗  
賊于愛子江擒季擴十二年八月檻至京伏誅十  
三年四月以輔爲征夷將軍總兵鎮交趾十四年  
十一月召輔還豐城侯彬代輔十六年正月清化

土官巡檢黎利反侯彬遣都督朱廣往勦之利初  
從季擴爲金吾將軍已而來降令爲土巡檢輔還  
遂反稱平定王以弟黎石爲相國段莽都督聚賊  
衆范柳范晏等肆出劫掠廣兵至斬首六百擒晏  
利遁去彬請就交趾戮晏等以徇七月交趾右布  
政使莫助及交州知府杜希望令縣丞黎獻率家  
人五百力役北京十七年巡按御史黃宗載言交  
趾新入版圖勞來尤在得人今府州縣多兩廣雲  
南歲貢生及下第舉人未入國學乞仕遠方遂授  
以職旣乏大學教養之素又非諸司歷試之才以



故牧民者不知撫字理刑者不諳法律若候九年黜陟廢弛益多宜令到任二年以上者從巡按御史及布按二司嚴覈其廉汙能否上狀黜陟從之十八年五月勅侯彬叛寇黎利潘僚車三農文歷等迄今未獲未審兵何時得息民何時得安宜盡心畫方略早滅此賊交趾叅政侯保馮貴討賊戰死十九年五月彬請屯田九月彬言利奔老撾我進兵討捕老撾輒遣頭目覽耆郎阻我兵勿入境云即發兵象大索利送軍門久之竟不獲利上曰老撾匿賊持兩端令彬遣頭目至京詰之是冬

赦利以爲清化知府遣內官山壽諭利二十二年仁宗即位召福還以洽爲兵部尚書代福是冬交趾叅將保定侯瑛榮昌伯智言壽未至利復反改大理寺卿楊時習爲按察使以弋謙爲布政使內官馬騏自交趾召還未幾矯旨下內閣書勅復往交趾開辦金銀珠香內閣覆請上正色曰朕安得有此言此奴曩在交趾荼毒軍民卿等獨不聞乎自騏召還交人如解倒懸豈可再遣然亦不誅騏也洪熙元年二月以智爲征夷副將軍總兵討利六月宣宗即位七月命行在兵部侍郎戴綸



副洽贊理智軍務八月賊阮可郎等伏誅十一月  
勅智及安平伯安都督方政及三司賊利包藏禍  
心已非一日始若易取誤信人言惟事招撫迄今  
八年終不聽命忠臣罹害良民被毒其誰之過智  
等其急進兵務協和成功來春不捷論罪是月  
上欲棄交趾問英國公輔尚書義原吉皆曰不可  
棄問內閣士竒榮皆頓首稱善宣德元年三月智  
政兵討利進至茶籠州敗績四月以成山侯通爲  
征夷將軍總兵都督馬瑛叅將討賊尚書洽仍贊  
叅軍務安平伯安掌交趾都司事削智政官爵五

月赦交趾十一月通擊賊敗績十二月賊攻清化  
州不利引去以安遠侯升爲征虜副將軍總兵保  
定伯銘左副總兵都督崔聚右叅將由廣西黔國  
公晟爲征南將軍總兵興安伯亨左副總兵新寧  
伯忠右副總兵由雲南率兵兩道討賊兵部尚書  
李慶叅贊軍務工部尚書兼詹事黃福仍掌交趾  
布按二司事勅通守城練兵侯升等至進兵二年  
正月 上念久用兵勞費又問大臣士竒榮力贊  
上止兵棄交趾便利攻交趾城通等出戰敗之斬  
僞司徒司空太尉少尉太監黎笏等四月利陷昌



四夷考 卷一  
江通歛兵不出賊書與通請和通遂許清化諸州地與賊遣指揮闕忠與利所遣人上表貢方物七月賊破隘留關圍丘溫鎮遠侯興祖擁兵南寧不肯援城陷逮興祖九月升等師至隘留關利遣人詣軍門上書言窮迫乞罷兵立陳氏後升易賊賊伏四起升中鏢死是日銘病卒明日慶亦卒聚兵亦敗諸將兵皆阻賊不得進十月通出下哨河立壇與利盟約退師且宴利遺利金織文綺利亦以重寶謝通是月忠及利所遣人至京表以陳暲爲名實出利 上覽表示羣臣曰賊表乞復立陳氏

後從之便抑不從便群臣以內閣主議故皆曰從之便 上曰然十一月以行在禮部侍郎李琦工部侍郎羅汝敬充正使通政黃驥鴻臚卿徐永達副使詔諭安南言利表言前國王遺嗣暲尚在老撾國人乞封暲王永奉職貢頭目耆老其以實對朕即遣使授封朝貢如洪武故事又勅通等即日班師內外鎮守三司衛所府州縣文武吏士携家來歸三年正月通馳奉僞王陳暲遣黎少頴表貢代身金銀人謝罪并送我叛人都督都指揮蔡福等還京乞班師臣兵寡援絕人情警懼賊控據水



陸陷奪城池臣與衆議不如因其納貢請降全師  
出境再圖後舉臣已率將士還至南寧俟命 上  
覽奏勅通虧損臣節遺笑蠻方如國體何三月少  
穎至京表稱安南國先陳王臣頤三世嫡孫臣暲  
及頭目臣黎利云四月通至京群臣劾通及瑛智  
安政布政使弋謙內官山壽馬騏等下廷鞫言通  
等失律喪師棄地壽曲護叛賊騏激變藩方論死  
繫詔獄籍其家瑛等坐罪有差與祖亦下詔獄五  
月琦汝敬等還利遣人表謝言暲會病卒族人並  
絕國中推利守國候命汝敬永達復奉詔諭利及

耆老訪陳後聞群臣又劾晟亨忠奉命與升掎角  
進兵顧逗遛逾時方臨賊境與升等聲聞斷絕賊  
得專力拒我及聞升陷沒又不進援通等輒狼狽  
引退爲賊所乘殺傷吏士委棄鎧杖賊勢益橫城  
池失守乞亟正邦刑 上曲赦晟令臺中緘劾章  
示晟亨忠俟還京論罪贈交趾死節都指揮李任  
指揮顧福劉順徐騏周安千戶蔡顥桂勝知府劉  
子輔易先知州何忠內官馮智等官武官世職文  
官復其家誅叛臣蔡福等籍其家四年二月汝敬  
等還利遣人貢方物三月遣琦永達行人張聰勅



四庫全書  
卷一百一十一  
論利三月琦等還利遣人貢金銀釵器方物并上  
國人奏言陳氏無後利撫綏有方得民心乞令管  
攝永爲藩臣奉職貢六年五月利遣人陳情謝罪  
貢方物六月遣行在禮部侍郎章敞通政徐琦詔  
利權署安南國事七年二月敞等還利遣人貢謝  
八年八月利遣人入貢九年三月廣西總兵山雲  
言利死長子狂妄次子幼弱姦臣黎問黎察構黨  
相讐殺夷民驚懼諒山土官阮世寧七源土官阮  
公廷率衆避難來歸願居廣西龍州及太平府上  
下凍州勅雲利本起微賤因奏立暲從人望朕志

在息民遂詔罷兵徐議立暲利遽奏暲死暲之死  
利所爲也朝廷即欲問罪不忍毒民令權署國事  
多行不義爲天所殛爾戒飭邊兵嚴謹守備勿忽  
世寧公廷可善撫之四月琦等還言利死利子麟  
遣人告喪獻金人方物五月遣行人郭濟朱弼祭  
利十月麟令人上表請命遣敞及行人侯璉諭麟  
仍權署安南國事十二月欽州貼浪如昔人叛降  
麟正統中麟卒子濬嗣天順中濬被篡弟灝嗣弘  
治中灝卒長子暉先卒子誼嗣正德初誼被篡國  
人請以灝庶子調嗣 朝廷登極改元遣使詔諭



四夷考 卷一  
交酋亦數遣使朝貢然時時南侵占城占城上聞  
諭禁之輒陽聽命侵盜如故已而中國人多潛入  
交南至有受僞御史者教之窺伺雲南太監錢能  
貪殘令京衛指揮郭景矯奉勅旨往來交南猾夷  
奸闌出入莫敢誰何遂誘我逋逃覘我虛實鎮南  
關外類多華人而臨安諸郡所在有夷賊矣於是  
撫臣屢請增置文武吏士控制彈壓然交人侵奪  
欽州里社我亦不能禁是時凋弱懦無爲境內盜  
起羣下專權虐政暴征人不堪命正德十年凋遣  
阮仲達朝貢是年陳暲作亂殺凋奸酋莫登庸及

其子方瀛結黎義昭等共推凋從子諱嗣而討殺  
陳暲嘉靖改元遣使詔諭凋且死七年矣諱不  
請封輒改元光紹暲父子亦據諒山等府稱王改  
元天應莫登庸妻瀨妻逼諱走海濱使命不能達  
而還當是時登庸遂與陳氏分據交地杜溫閏鄭  
綏不肯從登庸已而諱死登庸又曰瀨有子應諱  
弟也矯立應相拒交人曰瀨死久矣應本登庸子  
諱同母弟也嘉靖初田州岑猛叛兩廣總督姚鎮  
計鴆殺之謂岑氏可遂滅疏請設流官治田州而  
盧蘇王受諸孽輒通交南流言搖惑滇嶺間人鎮



被論落職桂萼初嚮用言提督兩廣非新建伯王  
守仁不可遂起新建伯兼兵部尚書總制兩廣江  
湖諸省軍務新建伯至嶺南始知流官不可設請  
復官猛子邦相爲田州判官盧蘇亦與土巡檢羈  
縻之尋新建伯病謂翁萬達曰田州事非我本心  
後世誰諒我者新建伯初起用皆萼之力萼議禮  
致位卿輔欲立奇功會安南有亂冀可傳檄取之  
乃陰以意寓書授新建伯若專爲思田者使密探  
安南要領而新建伯不答直於奏尾稍及之萼遂  
恚憾會新建伯卒竟中傷革世爵及卹典云嘉靖

十五年哀冲太子生頒詔諸夷禮官言安南久不  
廷不必遣使請發兵討之下廷議諸大臣不可勅  
錦衣衛官使安南察之已而又遣禮部尚書黃綰  
翰林學士張治使安南時車駕巡承天綰治行有  
日又復止兩廣守臣言安南莫氏篡逆國內大亂  
時出侵掠遂命兵部尚書毛伯溫至廣東議方畧  
進兵討莫氏會莫氏請命嶺南知府廉州張岳梧  
州翁萬達廣州鄒守愚及巡撫諸臣亦不欲用兵  
騷動數省條議上伯溫請赦莫氏以爲安南都統  
使會登庸死伯溫請以制命授其孫福海嘉靖二



十年六月班師論功進秩賞賚有差未幾福海復  
爲黎寧所逐黎氏仍據國莫氏竄居南海島上朝  
廷置不問交趾東起欽州西歷左江北至臨安元  
江龍州其孔道憑祥其要害也由臨安經蒙自河  
蓮花灘至其東都可四五日其俗夷獠雜居不知  
禮義獷悍喜鬪不解耕種椎髻剪髮好浴善水平  
居不冠惟交愛人倜儻好謀驩演人淳秀好學其  
山川佛跡勾漏海富良江爲大產金珠珊瑚玳瑁  
丹珠諸香蘇合油胡椒羚羊角犀象兕白鹿猩猩  
狒狒白雉翡翠蚺蛇蟻子鹽鹽波羅蜜烏木蘇木

境內有越王城天使館浪泊柱銅鼓

兀良哈

兀良哈在烏龍江南漁陽塞北春秋時山戎地元  
爲大寧路戶四萬六千口四十四萬八千國初割  
錦義建利諸州隸遼東設都司於惠州領營興衛  
二十餘衛所謂北平行都司也洪武十四年封  
子權於大寧爲寧王二十二年分兀良哈爲三衛  
於橫水之北曰朶顏曰福餘曰大寧處降胡以脫  
魯忽察兒海撒男奚阿札失里爲三衛指揮使同  
知並邊爲我藩籬靖難初首劫大寧兵及召兀良



哈諸酋率部落從行有功遂以大寧昇三衛寧王  
移封南昌徙行都司於保定爲大寧都司令三衛  
歲二貢貢衛百人東起廣寧前屯歷喜峰近宣府  
爲朶顏自黃泥窪逾瀋陽鐵嶺至開原爲福餘由  
錦義度遼河至白雲山爲大寧皆逐水草無恒居  
三衛朶顏最强分地又最險永樂中最親附宣德  
時嘗入漁陽塞 上率諸將出喜峰關敗諸虜于  
寬河誅其大酋自後稍馴順正統中又叛侵盜東  
北關諸寨索鹽米賞賜而已以故喜峰密雲間有  
都指揮或都督鎮守驗貢夷已已福餘大寧結也

先爲也先鄉道朶顏獨扼險不肯從也先至不能  
入塞不得利大掠福餘大寧人畜去始勅都御史  
鄒來學經畧已而設太監叅將又設總兵景泰四  
年守臣言兀良哈貢使往來不絕爲瓦剌間諜詔  
自後使至伴二三人入京餘不得輒入關成化四  
年與北虜毛里孩通侵天城遣都督李鐸詰之十  
二年通札加思蘭謀寇遼東勅邊臣備之然亦未  
敢大爲寇盜弘治中守臣楊友張瓊燒荒出塞掩  
殺邊釁遂起正德初部落旣蕃陽順陰逆累肆侵  
盜朶顏都督花當求添貢其子把兒孫深入擄掠



動稱結親迤北恐中國革蘭台者花當孫也兀良哈朶顏爲大部朶顏花當爲貴種花當長子革列孛羅早死其弟把兒孫驍勇十年把兒孫入馬蘭谷塞殺叅將陳乾遣都督桂勇討之把兒孫遣扯秃等來言請入貢且獻馬贖殺乾罪又謾言射林孛羅幹兒路阿刺忽旦夕且糾諸部大舉入寇令小失台呼扯秃等去我亦幸無事奏虜退班師未幾入寇叅將魏祥全軍覆沒時把兒孫狡劣屢謀奪適諸酋惡之不相附尋亦死花當種人皆附革蘭台革蘭台貢馬遲之未請嗣番官也邊臣言上

兵部令譯部落後許貢革蘭台遂入寇漁陽諸小關堡皆殘破嘉靖十一年九月巡撫王大用欲通朶顏與厚賂城其霧靈山不果是時酋阿堆哈利赤數入建昌喜峰太平諸塞殺掠人畜革蘭台又乞陞官兵部言大用喜事請以毛伯溫代大用出漁陽巡撫伯溫至鎮虜益盜邊邊人不得耕牧二十年革蘭台挾北虜求添貢貢衛三百人不許請衛二百人又不許時時出沒塞下輒云結小王子旦夕大舉入塞會俺答吉囊自大同深入大原不得已許其補前貢失期者衛二百人二十一年內



批胡守中侍郎兼憲職提督軍務撫勦守中儉險嗜利乾沒內帑金多又擅出塞盡伐遼金以來松木百萬自撒藩籬徧索富人舊將領金錢言官劾守中論死西市巡撫徐嵩阿事守中削籍已而有發嵩乾沒庫金者逮謫戍二十二年叛人白通事道虜數侵我塞巡撫許論伏兵斬白通事論進官副都御史請告去朱方代論以請撤防秋兵太早爲虜所掠逮至京杖死闕下職方郎中韓昂亦杖死方清勁勗端諒皆有才識死非其罪也二十五年虜大入塞明年北虜道兀良哈入寇遼東兀良

哈又結海西建州夷出入遼東西塞下

朝鮮

朝鮮周封箕子國也秦遼東外徼漢初爲燕衛滿所據武帝取爲真番臨屯樂浪玄菟四郡漢末爲公孫氏所據魏滅公孫晉并於高麗高麗本扶餘別種王高璉居平壤卽樂浪已而東徙鴨綠江東南千餘里後唐時王建代高氏并有新羅百濟又徙東松岳以平壤爲西京子孫遣使朝貢宋遼金歷四百餘年元至元中西京內屬置東寧總管府洪武二年王王顥表賀卽位遣符寶郎僕斯賜金



印誥命大統曆金綺封爲高麗國王并賜王母妃  
相國諸陪臣文幣五年王顥遣其禮部尚書吳季  
南民部尚書子溫表貢方物表言暹羅國恃其險  
遠不奉朝貢蒙古人留居其國宜徙之蘭秀山逋  
逃所聚亦恐爲寇患乞發兵討之賜璽書言暹羅  
隸爾國蒙古亦人類蘭秀山逋寇示以朕詔一呼  
可至勿用兵便十年以高麗貢使煩數遣故元樞  
密使延安答里諭意顥遣門下贊成事姜仁裕表  
謝貢方物 上令賀正旦使金濟及仁裕偕還賜  
王藥餌又諭中書省曰曩因高麗貢獻煩數遣延

安答里往諭朕意今一歲迭至困罷其民涉海險  
遠如渠往使洪師範歸國覆溺幸有脫歸者言其  
故否且致疑古諸侯事天子比年一小聘三年一  
大聘若九州外遠番世一見而已貢物亦無過侈  
高麗去中國稍近人知經史文物禮樂畧似中國  
非他邦比宜令三年一聘或比年一聘貢物產布  
十疋足矣丞相其以朕意諭王諸新附遠邦來朝  
亦明告以朕意中書因使者還咨諭之十六年遣  
使張伯崔泊來貢以違命却之令禮部諭王十七  
年諭遼東守臣絕高麗十八年國人立王禡爲王



禍貢布萬疋馬千匹謝是秋封禍爲高麗國王賜其故王顓謚恭愍十九年請易冠服不許二十二年國相李仁人劫囚禍而立其子昌爲王遣使姜伯淮朝貢是年仁人子成桂廢昌而立定昌國院君王瑤主國事二十四年瑤遣使朝貢又令其子奭朝明年正月詔位尚書下是年令奪高麗馬萬匹索闈人二百二十五年成桂囚瑤及奭於其私第自主國事是年知密直司事趙胖等以其國都評議司奏至奏言恭愍王薨無嗣李仁人以他人子禍主國事昏暴好殺謀侵遼東大將李成桂力

阻乃已禍自知負罪遜位於子昌國人弗順啓恭愍王妃安氏擇立宗親定昌國院君王瑤權國事及今四年昏迷信讒其子奭亦癡騃縱酒色與禍黨玄禹實等謀復禍位守門下侍中鄭夢周曲附王瑤謀害成桂及趙俊鄭道傳南閻等今年七月國中臣民以安妃之命退瑤於私第擇于宗親無可立者衆推門下侍郎李成桂主國事 上曰朕中國綱常所在列聖相傳守而不失高麗限山隔海僻處東夷非我中國所治且事多隱曲不可據信令禮部移文從其自爲聲教成桂更名旦徙居



漢城遣使請更國號詔更號朝鮮曰遣使請印誥  
上覽表恠曰不遜詰使者使者言表鄭集撰 上  
盡却方物索集曰懼送集至京安置雲南二十七  
年令遼東絕朝鮮二十九年請印誥不許三十一  
年府部請發兵討朝鮮不許旦老請子芳遠嗣旦  
卒謚康獻永樂元年賜金印誥命冕服九章圭玉  
珮玉列女傳春秋會通大學衍義通鑑綱目諸書  
十七年芳遠老請子禔嗣芳遠卒謚恭定宣德初  
賜禔五經四書性理大全通鑑綱目五年禔遣使  
獻海青鷹使還賜王磁器諭禔王國中多珍禽異

獸然朕所欲不在此後勿獻自後聖旦元曰皆使  
朝貢王請封慶弔謝使來無常期朝廷有大政頒  
詔其國及王請嗣封皆遣使正統間賜王遠遊冠  
絳紗袍翼善冠龍袞玉帶景泰元年禔卒命子珣  
嗣珣卒賜謚恭順命子弘暉嗣弘暉幼叔瑑以讓  
位請七年封瑑爲王瑑後不知幾傳而瑑立正德  
元年瑑卒謚康靖子愷立踰年而世子顛卒愷病  
風遜其弟懌正德二年懌立十五年封子崐爲世  
子嘉靖二十三年懌卒二十四年崐立未踰年卒  
二十四年崐弟岫立三十六年封長子顛清爲世



子岷疏乞改 大明會典中所載成桂篡逆事從  
之其國東西南濱海北鄰女直西北至鴨綠江東  
西相距二千里南北四千里分八道統府州郡縣  
俗柔謹知文字喜讀書崇釋尚鬼惡殺戴折風巾  
服大袖衫男女相悅爲婚死三年始葬飲食用俎  
豆官吏閑威儀居皆茅茨衣多麻苧以田制俸以  
秬醞酒法無苛條刑不慘毒山川九都神嵩北岳  
海鴨綠江爲大產金銀鐵水晶鹽紬苧布白硃紙  
狼尾筆果下馬長尾雞貂豹皮八梢魚昆布  
杭黍麻榛松人參茯苓

### 琉球

琉球在海東南自福建梅花所開洋順颶利舶七  
日可至漢魏至唐宋不通中國隋嘗遣兵虜其男  
女五千人元遣使招諭竟不從洪武初國分中山  
山南山北稱三王遣使朝貢十五年賜中山王察  
度山南王承宗鍍金銀印金幣使還言三王爭雄  
相攻賜詔諭之并諭山北王怕死芝十六年賜山  
北王印文綺王妃姪相寨官各有差二十五年中  
山遣子姪及其陪臣子弟入國學 上喜禮遇獨  
優賜閩人三十六姓善操舟者令往來朝貢永樂



四年考  
二年察度卒詔封其世子武寧嗣王是年山南王承察度卒無子令其從弟汪應祖攝國事應祖使來請命如山北王故事諭蹇尚書遣使賜應祖冠服嗣山南王九年中山王思紹令坤宜堪彌貢馬及方物以其長史程復來見表言長史王茂輔導有年乞陞國相兼長史事又言復本中國饒州人輔臣祖察度四十餘年不解于職今年八十有一乞令致仕還其鄉 上從之陞復琉球國相兼左長史致仕還饒茂國相兼右長史景泰元年中山王尚思達遣人朝貢三王嗣封皆請於朝已而山

南山北爲中山所并中山遣使朝貢令三年一貢貢無過百五十人察度後五傳至尚圓嗣王卒子尚真嗣嘉靖十一年尚真卒子尚清請嗣遣左給事中陳侃行人高澄以太牢祀真封清嗣王賜王妃冠服錦幣使臣疏言弘治正德時修譟羅倫等嘗使安南安南乞留詔勅爲鎮國之寶倫爲請得留卽琉球請留如安南海外遠不得卽請乞下禮官議議請如安南使至國授封王拜曰天朝詔勅藏金匱者八葉于茲矣請留使許之比還遣其王親寧吉長史蔡瀚上表謝使上使琉球錄言大明



一統志中載琉球有落滌王居壁下聚觸體非實  
事杜氏通典集事淵海羸蟲錄星槎勝覽所述亦  
皆傳者妄也乞下史館從之其俗以盈虛爲晦朔  
以草木爲冬夏人皆去髭黥手羽冠毛衣無禮節  
好剽掠既遣人學於國學夷習稍變奉正朔設官  
職被服冠裳陳奏章表著作篇什有華風焉今其  
國中王下有王親不與政次法司官次察度官司  
刑名次邪霸港官司錢穀次耳目官司訪問皆土  
官爲武職以上世及所轄地爲姓名其大夫長史  
通事官司朝貢有定員爲文職皆三十六姓人及

學於國學者爲之王并日視朝旦中晷凡三朝羣  
臣搓手膜拜尊且親者入殿坐飲酒卑䟽者移時  
長跪階下歲元旦聖節長至君臣冠服拜龍亭祝  
慶子爲親喪數月不肉食人死以中元前後日浴  
尸溪水去腐肉取骨纏以布帛裹葦草埋土中王  
及諸臣家匣骨藏山穴竅木爲小牖歲時祭掃啓  
視之地無貨殖不通商賈朝貢乘大航海上漁鹽  
泛小艇無竹筏信鬼畏神神以婦人爲尸號女巫  
女巫之魁稱女君白日呼嘯聚輒數百人携杖戴  
草騎步縱橫時入王宮褻遊狎戲一唱百和音聲



四夷考 卷一 三百八十八  
悽慘倏忽往來莫可踪跡馮附淫昏矯誣禍福王  
及世子陪臣皆頓首拜跪王居山巔國門名歡會  
府門漏刻殿門奉神朴素無金碧之飾賦法略如  
井田王臣民各分土爲祿食上下無征歛有事一  
取諸民事已卽已用刑甚嚴盜竊卽荆剗家富貴  
者瓦屋不過二三楹餘皆茅土風雨飄搖以螺殼  
爨爨無釜甑耕無鐵婦人嚼米爲酒男子煮海爲  
鹽市用日本錢十當一如宋季鸞眼縊貫人無貴  
賤皆驍健耐勞苦饑寒不知醫藥而無疾疫兵甲  
堅利射可至二百步進止有金鼓鄰國視爲勍敵

然好爭狠鬪輒刃殺人度不能脫卽剖腹自斃其  
山川鼉鼉嶼彭湖島爲大或曰國西古米山有礁  
甚險舟至輒敗卽落滌也產馬海巴牛皮磨刀石  
硫黃銅錫扇山無猛獸以故多野馬牛豕鬪鏤木  
蘇木胡椒諸香非其產也又有小琉球近泉州閩  
人言霽日登鼓山可望而見入國朝未嘗朝貢或  
曰并入琉球琉球旁有毗舍那者島中小夷鳥語  
鬼形袒裸盱睢殆非人類不通中國

### 女直

女直古肅慎氏在混同江東東瀕海西接兀良哈



南鄰朝鮮北至奴兒干其地有長白山橫亘千里  
高二百里巔上有潭周八十里南流爲鴨綠江北  
爲混同混同江在開原城北千五百里又有松花  
江在開原城東北千里黑龍江在開原城北二千  
五百里與混同皆南入松花元設諸府路領混同  
江南北水達達及女直人 明興遣人招諭永樂  
九年春遣將將水軍駕巨艦至江上召集諸酋豪  
餌以官賞於是東旺佟答刺哈王肇州瑣勝哥四  
酋率衆降始設奴兒干都司以四酋爲都指揮賜  
勅印又置衛所三百八十二官諸小酋爲指揮千

百戶鎮撫又有地面五十八站七寨一皆令三歲  
朝貢官賞羈縻之又置馬市開原城通交易稍給  
鹽米布贍諸酋豪使保塞不爲邊寇盜各路有水  
陸城站自湯站東抵開原曰建州毛鄰海西野人  
兀者皆有室廬建州最強開原北近松花江者曰  
山夷又北抵黑龍江曰江夷亦有室廬江夷爲強  
建州毛鄰本渤海氏遺孽喜耕種善緝紡飲食衣  
服頗有華風海西有山夷即熟女直完顏餘種亦  
務耕稼婦女喜金珠倚山作寨亦名山寨夷江夷  
居黑龍江即生女直數與熟女直讐殺百十戰不



休諸夷皆善射馳獵好盜建州夷尤善治生其左右二衛最無賴江夷以北有阿哈婁得悍狡自相雄長大抵東北諸夷建州處要害居中與諸夷勢聯絡相掎角五嶺喜昌石門險隘人騎不得成列虜人視爲咽喉永樂間開原降虜楊木答戶者率數百騎奔建州已而建州酋李滿住款塞求內附駐牧蘇子河日強盛靖難未久專事撫綏桀驁漸爲邊患一歲間入寇者九十七殺虜吏民十萬餘正統末附也先入塞侵遼東西景泰中諸酋多死也先之亂盡失賜勅諸子孫不得請官以舍人入

貢賞宴大減以故怨忿思叛成化二年酋董山遂糾衆入寇三年武靖伯趙輔克總兵都督王瑛封忠爲副左都御史李秉督軍率漢番京邊官軍五萬討之山降送京師放歸廣寧輔秉曰山不可宥請誅山九月分左軍出潭河柴河越石門土木河至分水嶺右軍由鴉鶻關喜昌口過鳳凰城黑松林摩天嶺至潑猪江中軍自撫順經薄刀山鮎魚嶺過五嶺度蘇子河至虎城期日會兵進勦朝鮮亦遣中樞府知事康純魚有沼南怡率兵萬人遏其東走我兵擣賊巢虜遁擒斬俘獲虜指揮若女



等千人班師指揮張額的里率妻子乞降朝廷憐而釋之明年留韓斌爲副總兵防守築撫順清河靉陽諸堡未幾諸夷憤欲報山讐相約入寇十四年入塞殺掠人畜無算巡撫陳鉞掩降虜爲功又附太監汪直開邊隙出塞撲殺諸夷諸夷益恨我大入塞殺掠吏民遣兵部侍郎馬文升反直撫勦直倖用事幸功陰爲鉞地要文升偕行文升弗聽疾馳至鎮撫定黑鎖忒諸酋比直至虜已解散直大怒文升還奏文升妄啓邊釁謂女直建州諸虜皆以文升曩在鎮禁不與易農器故屢寇塞上遣

直及刑部尚書林聰即訊遼東報上盡如直言下文升詔獄文升言實禁鐵器非農器不聽竟謫戍重慶已而直敗貶內使南京鉞亦敗下詔獄文升得雪復官致仕正德八年海西加哈義叛嘉靖二十四年巡撫於敖滅賞物夷人大譁不能拊顧詐殺諸譁酋夷人大恨數入塞殺掠大慘胡宗明代敖不能禦降浙江叅議二十七年大虜通兀良哈諸女直入遼東代宗明巡撫李珣又論罷遼東西大困產楛矢石磬赤玉真珠金麻布鹽馬黃狃虎羆狐狸海上有海豹驢獐猪羊狗野有野猪牛驢



貂鼠青鼠失刺孫好刺殊角殊角卽海象牙魴鬚  
鯨睛海東青鷹鷄鴉鶻鳧鱈牛魚粟麥稔

### 三佛齊

三佛齊卽舊港又名淳淋在東南海中本南蠻別  
種初隸瓜哇有地十五州東距瓜哇西距滿刺加  
南距大山西北濱海番舶輻輳多廣東漳泉人土  
沃宜稼穡人好賭博習水戰服藥刀不能傷遇敵  
敢死鄰國畏之水多土少將領得居陸民率架筏  
水中架梁柱語言如瓜哇市用錢布字用梵書其  
屬有單馬令凌牙斯蓬豐登牙儂細蘭諸國洪武

初王恒麻沙那阿稱臣入貢四年遣玉的力馬罕  
亦里麻思奉金字表朝貢賜大統曆文幣六年使  
來貢八年使從我招諭拂菻十年恒麻沙那阿卒  
賜王子麻那者巫里三佛齊國王印印駝鈕銀質  
鍍金是時廣東有陳祖義者脫罪避居其國久之  
得爲將領暴橫掠過客永樂中太監鄭和統海舶  
下西洋至三佛齊有施進者祖義鄉人也訴于和  
和擒殺祖義承制官進仍留舊港爲將領進沒女  
嗣官產鶴頂火雞神鹿金銀水晶珠瑠璃珊瑚犀  
角象牙龍腦諸香猫睛石薔薇水阿魏沒藥血結



鶴頂鳥大於鴨腦骨厚寸餘外黃內赤鮮麗可愛  
火雞大於鶴頸足亦似鶴軟紅冠銳觜毛如青羊  
色爪甚利傷人腹致死食炭神鹿大如巨豕高可  
三尺短毛豕喙蹄三趾

### 占城

占城古越裳秦林邑漢象林漢末區連殺縣令自  
稱林邑王遂不入版圖唐元和初改號占城宋淳  
熙中襲破真臘慶元中真臘復讐俘殺幾盡更立  
真臘人爲主洪武二年遣吳用顏宗魯楊載等使  
占城爪哇日本等國賜王璽書是年遣使蒲旦麻

都朝貢言安南侵境上遣使招諭安南罷兵是年  
國主阿答阿者遣虎都蠻來朝貢虎象遣中書省  
管勾甘桓會同館副使路貢賢封阿答阿者爲占  
城國王賜大統曆金綺四年阿答阿者遣答班瓜  
卜農奉金葉表朝貢言安南數侵境乞賜兵器樂  
人俾安南知我乃聲教所被輸貢之地不敢輒欺  
負上憐之命中書省咨王言交隣有道事上以  
誠占城安南旣皆臣事朝廷豈可擅兵相毒卽咨  
安南令其罷兵兵器不爾各但以安南故賜爾是  
助爾構兵也樂器有聲律華夷方言本異中國人



不可遣遣爾國人能習華音者來習肄十六年遣  
子來賀聖節賜勘合文冊二十四年使至以臣弑  
君故絕之永樂四年王占巴鎖里人勅王的賴得  
黎賊父子及其黨惡卽械送京尚書陳洽在南交  
軍中馳奏占城國王占巴的賴奉命出兵討安南  
陰懷二心愆期不進及進至化州輒肆虜掠又以  
金帛戰象資季擴季擴亦以黎蒼女遺之復約季  
擴舅陳翁挺等三萬餘人復侵升華府隸四州十  
一縣地驅掠人民罪下季擴一等耳請發兵討之  
上以交趾初平不欲窮兵遠夷遣使諭王歸我侵

地永樂後遣人朝貢令三年一貢正統六年國人  
請封其嗣王遣使冊封成化中遣使冊封正使卒  
海上副使論罪戍邊其國在大海南南距真臘西  
距交趾東北際海自閩長樂五虎門西南行順風  
可十日至東北百里海口立石塔爲標舟至是繫  
焉俗獷悍果于戰鬪尚釋教王冠三山金花玲瓏  
冠衣白跣足乘象或黃犢車臣莖葉冠男蓬頭女  
後椎結所居茅茨不得踰三尺衣紫衣衣玄黃罪  
死出入乘象馬粒食亦鮮食殺牛祭鬼驅象逐邪  
市用金銀焚衣祭天釀酒甕中俟熟賓主繞甕坐



筒而輻且輻且注水味盡而止文書用羊皮及黑木皮無閏月晝夜各分五十刻王當賀日沐人膽汁將領獻人膽爲賀王在位三十年卽入山茹素受戒令子姪攝國居一歲顓天矢日我不道當克虎狼食或病死暮年得無恙復入爲王於是國人呼爲芳嚟馬哈刺札云有號屍致魚者婦人也目無瞳夜飛頭入人家食小兒穢氣侵兒腹兒卽死頭返合體如故失其體不得合卽死夫不聞者罪之產金銀錫鐵獅象犀牛瑇瑁諸香朝霞大火珠菩薩石薔薇水猛火油檳榔諸文異木胡椒白藤

吉貝絲絞白氎布孔雀山雉伽南香惟此地有之價亦高觀音竹如藤長丈八尺許色黑如鐵寸二三節犀角象牙最多犀如水牛大者八百斤體黑無毛蹄有三趾獨角在鼻端長者可尺五寸馬小於驢波羅蜜形如東瓜

日本

日本古倭奴國海中諸夷倭奴最大西南至海東北大山國主世以王爲姓羣臣亦世官地分五畿七道三島又有附庸國百餘拘邪韓最大其國小者百里大不過五百里戶少者千多止一二萬皆



倭種也漢滅朝鮮通使稱王者三十餘國倭王最  
雄長者居邪馬臺即邪摩維歷漢魏晉宋隋皆朝  
貢稍習華音唐咸亨初惡倭名更號日本國朝洪  
武二年倭寇山東並海郡縣又寇淮安三年寇山  
東轉掠浙東福建旁海諸郡是年遣萊州府同知  
趙秩賜璽書諭其王良懷言倭寇海上書至日如  
臣我奉表來庭不臣則修兵自固秩至諭王中國  
聖主威德責其人貢王曰吾國未嘗不慕中國願  
蒙古戎狄蒞華以小國視我乃使趙良弼詠我好  
語初不知其覘我國也既而發舟數千襲我比至

一時風霆漂覆幾無遺類自是不與通者數十年  
爾得非良弼後乎將刃之秩徐曰聖天子生華帝  
華非蒙古比我亦非良弼後爾殺我禍不旋踵王  
氣沮禮秩具物遣僧隨秩奉表稱臣入貢使未至  
又掠温州五年 上諭劉基曰東夷尚禪教姑遣  
明州天寧僧祖闡南京瓦官僧無逸開諭之良懷  
欲留二僧力辭王遣使同二僧入貢是年寇海鹽  
澈浦温州初令浙江福建造海舟防倭而倭又寇  
福建海上諸郡六年以於顯爲總兵官出海巡倭  
倭寇登萊七年寇膠州是年遣僧來貢無表文却



之其臣亦遣僧貢馬茶布刀扇 上曰此私交也  
亦不受令中書省移文責王九年遣僧歸廷用等  
奉表貢馬及方物謝罪賜王及使文綺有差已而  
上覽表曰良懷不誠詔責之十二年來貢無表文  
安置使人於陝西番寺十三年遣使詔諭良懷遣  
僧如瑤貢馬令禮部移書責王數掠我海上復却  
之諸僧皆安置川陝番寺十四年遣僧入貢乞還  
安置諸僧使 上曰日本既謝罪還其使召至京  
宴賞遣歸十五年歸廷用又來貢於是有林賢之  
獄曰故丞相胡惟庸通日本蓋 祖訓所謂日本

雖朝實詐暗通奸臣胡惟庸謀爲不軌故絕之也  
是時惟庸死且三年矣十六年寇金鄉平陽十七  
年如瑤又來貢坐通惟庸發雲南守禦是年信國  
公和致仕居鳳陽 上召至京諭曰日本小夷屢  
擾東海上卿雖老強爲朕行視要地築城防此賊  
信國公築登萊至浙沿海五十九城民丁四調一  
爲戍兵二十年置浙東西防倭衛所是年遣江夏  
侯周德興築福建海上十六城設衛所遂堞福建  
漳泉人爲兵戍並海衛所二十六年寇金鄉二十  
七年二月遣都督僉事劉德商高巡視兩浙防倭



三月又勅都督楊文尋又勅魏國公徐輝祖安陸侯吳傑練浙江海上兵防倭二十八年寇金州靖難後太監鄭和等率舟師三萬下西洋日本遣人來貢并擒獻犯邊賊二十餘人即付使人治之縛置甌中烝死永樂二年使還遣通政趙居任賜王冠服文綺金銀古器書畫又給勘合百道令十年一貢每貢正副使等毋過二百人若貢非期人船踰數夾帶刃鎗並以寇論居任還不受王餽上喜厚賜之尋命僉都御史俞士吉賜王印誥冊封爲日本國王詔名其國之鎮山曰壽安鎮國山

上爲文勒石久之嗣王道義卒子源道義嗣益奸狡時時令各島人掠我海上九年寇盤石十五年寇松門金鄉平陽是年遣禮部員外郎呂淵諭王還所掠海上人十六年遣使謝罪當是時數入金蓋都督劉榮總兵守遼東繕海上墩堡伏兵伺之十七年倭船入王家山島傳烽沓至榮率精兵疾馳入望海塢賊數千人分乘二十舟直抵馬雄島進圍望海塢榮發伏出戰遣奇兵布伏諸山下斷其歸路賊奔入櫻桃園榮合兵圍而攻之斬首七百四十二捕生八百五十七召榮至京封廣寧伯



自是不敢窺遼東二十年寇象山初方國珍據溫  
台處張士誠據寧紹杭嘉蘇松通泰諸郡皆在海  
上方張旣降滅諸賊強豪者悉航海糾島倭入寇  
以故洪武中倭數掠海上 高皇旣遣使命將築  
城增戍又命南雄侯趙庸招蛋戶島人漁丁賈豎  
蓋自淮浙至閩廣幾萬人盡籍爲兵分十千戶所  
於是海上惡少皆得衣食於縣官洪武末年海中  
方張諸逋賊壯者老老者死以故旁海郡縣稍得  
休息永樂初西洋之役雖伸威海表而華人習知  
海夷金寶之饒夷人來貢亦知我海道奸闌出入

華夷相糾以故寇盜復起非廣寧之捷禍未已也  
宣德元年遣人來貢人船刀劍不奉我約束 上  
諭使臣自後貢毋過三舟使人毋過三百刀劍毋  
過三十否不受七年遣人來貢如約束受之八年  
源道義卒命太監雷春少卿潘賜等弔祭十年嗣  
王遣使貢謝倭自得我勘合方物戎器滿載而來  
遇官兵矯云入貢貢即不如期守臣幸無事輒請  
俯順夷情主客者爲畫可條奏即復許貢云不爲  
例嗣後再至亦復如之我無備即肆出殺掠滿載  
而歸宣德末年海防益備賊不得間貢稍如約遂



四夷考 卷一 三百八十七  
許夷至京師宴賞市易飽恣其欲已而備禦漸疎  
正統四年寇大嵩入桃渚官廩民舍焚劫一空驅  
掠少壯發掘冢墓束嬰孩竿柱上沃之沸湯視其  
啼號拍手笑樂捕得孕婦忖度男女剝視中否爲  
勝負飲酒荒淫穢惡至有不可言者積骸如陵流  
血成川城野蕭條過者隕涕於是朝廷下詔備倭  
命重帥守要地增城堡謹斥堠修戰艦合兵分番  
屯駐海上寇盜稍息七年來貢十一年寇海寧乍  
浦成化初忽至寧波知我有備矯稱進貢守臣爲  
請於朝且欲遣之至京楊文懿公守陳貽書張主

客力言其不可許二十年遣周瑋等來貢弘治八  
年壽莫來貢正德六年宋素卿源永壽來貢求祀  
孔子儀注不許鄞人朱澄告言素卿本澄從子叛  
附夷人守臣以聞主客以素卿正使釋之令諭王  
效順無侵邊八年僧桂梧等來貢嘉靖元年王源  
義植無道國人不膜諸道爭貢大內藝興遣僧宗  
設細川高遣僧瑞佐及素卿先後至寧波故事凡  
番貢至者閱貨宴席並以先後爲序時瑞佐後至  
素卿奸狡通市舶太監饋寶賄萬計太監令先閱  
瑞佐貨宴又令坐宗設上宗設席間與瑞佐忿爭



相讐殺太監又以素卿故陰助佐授之兵器殺總督備倭都指揮劉錦大掠寧波旁海鄉鎮素卿坐叛論死宗設瑞佐皆釋還給事中夏言上言禍起於市舶禮部遂請罷市舶而不知所當罷者市舶太監非市舶也夷中百貨皆中國不可缺者夷必欲售中國必欲得之以故 祖訓雖絕日本而三市舶司不廢市舶初設在太倉黃渡尋以近京師改設於福建浙江廣東七年罷未幾復設蓋東夷有馬市西夷有茶市江南海夷有市舶所以通華夷之情遷有無之貨收徵稅之利減戍守之費又

以禁海賈抑奸商使利權在上罷市舶而利孔在下奸豪外交內訶海上無寧日矣番貨至輒賒奸商久之奸商欺負多者萬金少不下千金轉展不肯償乃投貴官家久之貴官家又欺負不肯償貪戾甚於奸商番人泊近島遣人坐索久之竟不肯償番人乏食出沒海上爲盜貴官家欲其亟去輒以危言憾官府云番人據近島殺掠人奈何不出一兵備倭當如是及官府出兵輒齎糧漏師好語啗番人利他日貨至且復賒我如是者久之番人大恨諸貴官家言我貨本倭王物爾價不我償我



何以復倭王不掠爾金寶殺爾倭王必殺我盤據  
海洋不肯去近年寵賂公行上下相蒙官邪政亂  
小民迫於貪酷苦於徭賦困於飢寒相率入海從  
之凶徒逸囚罷吏黠僧及衣冠失職書生不得志  
羣不逞者皆爲之奸細爲之鄉道人情忿恨不可  
堪忍弱者圖飽煖旦夕強者奮臂欲洩其怒於是  
王忤瘋徐必欺毛醢瘋之徒皆我華人金冠龍袍  
稱王海島攻城略邑劫庫縱囚遇文武官發憤斫  
殺卽伏地叩頭乞餘生不聽而其妻子宗族田廬  
金穀公然富厚莫敢誰何浙東大壞二十五年以

朱統爲浙江巡撫都御史兼領興福漳泉治兵捕  
賊統清諒方勁任怨任勞嚴戢閩浙諸貴官家嘗  
言去外夷之盜易去中國之盜難去中國之盜易  
去中國衣冠之盜難上章鐫暴貴官通番二三渠  
魁於是聲勢相倚者大譁切齒詆誣惑亂視聽改  
統爲巡視未幾言官論劾又遣言官卽訊甘心煨  
煉必欲殺統統憤悶卒統所任福建有功海道副  
使柯喬都指揮盧鏜殺賊有功皆論死繫按察司  
獄於是華夷羣盜唾手肆起益無忌憚三十一年  
殘黃岩掠定海浙東騷動遣都御史王忤巡視兩



浙兼領漳泉興福四郡以都指揮俞大猷湯克寬  
爲浙閩叅將勦賊顧兵政久弛將士耗鈍水寨戰  
艦所在廢壞忬經畧未幾羣賊總至柵寨列港外  
約諸島內招亡命勢益猖獗三十二年大猷冒險  
出洋焚蕩巢穴首賊逸去羣偷流散乘風奔突倏  
忽千里溫台寧紹杭嘉蘇松揚淮十郡並受其害  
克寬統領步兵往來海堧護城捕賊斬獲亦多忬  
不肯隱敗冒功擒治奸豪破解支黨大猷克寬兩  
叅將皆知勇可任徒以江南人素柔軟賊未登岸  
望風奔潰文武大吏未能以軍法繩下而有司徒

往以軍法脅持富人巧索橫歛指一科百師行城  
守餉犒百物類多乾沒十不給一廉謹之士又謂  
南人善謗低頭束手不敢動一錢於是公私坐困  
戰守無策始釋柯喬起盧鏜而賊船聯翩滿海破  
昌國臨山霽衢乍浦青村南匯吳淞江諸衛所圍  
海鹽太倉嘉定入上海掠華亭海寧平湖餘姚定  
海諸州縣焚劫殺戰污辱慘於正統時矣而通番  
奸豪又言忬大猷搗巢非計且搖動忬忬薦鏜起  
爲閩叅將代克寬克寬以副總兵將屯金山閩人  
故忌鏜劾鏜凶險不可用南京言官又復薦鏜三



十三年遂犯江北海門如臯通州皆被殺掠是時復用盧鏜爲參將而以俞大猷爲浙直總兵未幾工部侍郎趙文華以海賊猖獗請禱海神遂遣文華行禱公私勞費不貲皆歸囊橐比忬改大同巡撫徐州兵備李天寵代忬南兵尚書張經提督浙閩江南北軍務有王江涇之捷文華素忌經天寵遂奏經天寵逮詔獄論死西市而以浙江巡按胡宗憲代天寵南戶部侍郎楊宜代經自後賊益熾縱橫出入二十六郡文華還朝未幾又出監督諸軍搜括官庫富豪金寶書畫數百萬計交通蒙蔽

以敗爲功以功爲罪雖有沈庄梁庄之戰竟莫救荼毒之慘兩浙江淮閩廣所在徵兵集餉提編均徭加派稅糧截留漕粟扣除京帑請給醮課迫脇富民釋脫凶惡濫授官職浪費無經其爲軍旅之用纔十之一征發漢土官兵川湖貴廣山東西河南北靡不受害臨賊驅之不前賊退遣之不去散爲盜賊行者居者咸受其害於是外寇未寧而內憂益甚矣宗憲計擒賊首王直浙西江東稍得安靖浙東溫台江北淮揚閩中嶺表尤被其毒已而俞大猷被中傷盧鏜代之賴朝廷 聖明大猷得



不死江北巡撫李遂有廟灣之捷入南兵部爲侍郎唐順之代遂福建巡撫王詢數有功畏讒引疾去代者劉燾宗憲以擒直功陞右都御史加太子太保叙子錦衣千戶先是文華陞工部尚書以論吏部尚書李默即加太子太保又以征倭功加少保子廕錦衣千戶不數月文華削籍千戶謫戍榆林自壬子倭奴入黃岩迄今十年閩浙江南北廣東人皆從倭奴大抵賊中皆華人倭奴直十之一二久之奸頑者嗜利貧窘者避徭賦往往喜賊至而貪殘之吏又從而驅之封疆之臣輒請添官當

事者不敢阻於是添設都御史三人總兵一人副總兵二人叅將十三人兵備副使十一人諸將校近百人田賦倍於常科徭徭溢於甲式矣其俗男子魁頭斷髮黥面文身婦人被髮屈紒皆跣足間用屨其喜盜輕生好殺天性然也物產金銀琥珀水晶硫黃水銀銅錢白珠青玉蘇木胡椒細絹花布螺蚶漆器扇犀象牙刀劍鎧甲馬交市華人喜得童男女錦綺絲綿磁針

### 真臘

真臘本扶南屬國一名占臘在東海中隋始通中



國唐神龍中并扶南而國分爲二其南近海多陂澤爲水真臘北多山阜爲陸真臘後復合爲一宋宣和初封爲真臘國王慶元中破占城立其國人爲占城王占城遂爲屬國又有參半真里登流眉蒲甘等國皆屬真臘聚落頗衆地亦廣洪武六年國王忽兒那遣柰亦告郎表獻方物賜大統曆文綺二十年正黎列保昆耶其苦者遣使貢象及方物景泰二年貢賜王及妃文綺朝貢至今不絕其俗尚華侈東向爲上右手爲潔縣鎮風習大類占城王三日一視朝婚娶燃燈不息視力耕種產銅

金諸香象翠羽嘉樹異魚

暹羅

暹羅本暹與羅斛二國在南海中暹土瘠不宜耕稼羅斛土平行種多穫暹仰給焉元至正間暹降羅斛洪武四年暹羅斛國王參烈昭毘牙遣柰思俚儕刺識悉替奉金葉表朝貢賜大統曆十年遣子昭祿羣膺奉金葉表貢象及方物遣使賜詔及暹羅國王之印十六年給勘合文冊令如期朝貢永樂元年稱暹羅國十五年瑣里人昭祿羣膺哆囉諦刺爲王遣柰必上表貢方物乞量衡式賜古



今列女傳金綺量衡令三年一朝貢宣德中稍減  
賜物著令其國方千餘里羣山環繞峭拔崎嶇地  
下濕土踈惡氣候嵐熱不齊自占城西南舟行七  
晝夜至其國王宮壯麗民樓居其樓密聯檳榔片  
藤繫之甚固籍以藤蓆竹簟寢處于中王白布纏  
首腰束嵌絲帨加錦綺跨象或乘肩輿尚釋教國  
人效之好爲僧尼婦人多智夫聽於妻妻與中國  
人私不爲怪男陽嵌珠玉富貴者範金盛珠行有  
聲婚則羣僧迎婿至女家偕取女紅貼男額稱利  
市喪禮貴者灌水銀葬民間鳥葬言語大類廣東

俗澆浮習水戰好鬪喜寇掠市用海貳煮海爲鹽  
釀秫爲酒產寶石奇香異木翠羽獅白象白鼠蘇  
木賤如薪色絕勝六足龜珊瑚

### 蘇門答刺

蘇門答刺即古蘇文達那西洋之要會也東南大  
山西北距海山連阿魯那孤兒黎伐三國自滿刺  
加西南行順風五晝夜至答魯蠻村舍舟陸行十  
里至其國無城郭有大溪入海海口大濤舶至此  
往往沒溺洪武中國王遣人奉金葉表貢馬及方  
物永樂三年國王鎖丹罕難阿必鎮遣阿里來朝



貢封爲蘇荅刺國王賜印誥金幣五年使來貢已  
而王與花面王戰敗中矢死子弱不能復讐其妻  
發憤令于國曰能復此讐者我以為夫與共國事  
有漁翁聞之率衆敗殺花面王王妻遂從漁翁永  
樂七年王來貢 上喜厚賜之十年遣使至其國  
故王假子率部衆殺漁翁王王子蘇幹利率衆奔  
于峭山時時相侵欲復讐十一年太監鄭和擒送  
京伏法漁翁王子感激貢方物甚夥宣德中貢使  
數至用金葉表十年封其子嗣王皆有賜至今朝  
貢不絕風俗淳厚言語和媚室廬婚喪衣服物產

類滿刺加田磽穀少熟番舶往來財貨充牣人饒  
富市用金錫錢惟酋長好殺殺人輒取血浴身花  
面王者即那孤兒王也國小僅比大村祇千餘家  
人皆務面以故號花面風俗語言類蘇門答刺

### 瓜哇

瓜哇古闍婆國又名莆家龍元稱瓜哇其國分東  
西二王所屬有蘇吉丹打板打網底勿諸國洪武  
三年王昔里八達刺遣八的占必奉金葉表貢方  
物及黑奴三百人納元所授宣勅已而我使至三  
佛齊瓜哇要而殺之十三年王八達那巴那務遣



阿烈彞烈時奉金葉表朝貢 上遣其使還詔諭  
責王遂絕其使永樂二年其國東王遣使朝貢請  
印與之五年西王都馬板與東王戰滅東王時我  
舟過東王城西王殺我百七十人西王懼遣亞烈  
加恩謝罪勅詰責西王令償死者黃金六萬兩已  
而遣人貢萬兩禮官請索如數 上曰朕利金耶  
令遠人知畏耳蠲其金賜鈔幣諭之十六年西王  
楊惟西沙遣人獻白鸚鵡正統八年令三年一貢  
其國四鄉初至杜板僅千家二酋主之流寓多廣  
東漳泉人又東行半日至廝村中國人客此成聚

落遂名新村約千餘家村主廣東人番舶至此互  
市金寶充溢人富饒又南水行可半日至淡水港  
乘小艇行二十餘里至蘇魯馬益亦有千餘家半  
中國人港傍大洲林木蔚茂有長尾猴數萬又水  
行八十里至漳祐登岸西南陸行半日至王所居  
滿者伯夷僅二三百家總領七八人王宮磚墉墉  
高餘三丈方三十餘里屋高四丈地覆板蒙藤花  
蓆踞趺而坐民居茅茨磚庫坐臥于內王蓬頭頂  
金葉冠胷繫嵌絲幌腰束錦綺佩短刀跣足跨象  
或乘牛民男蓬頭女椎結上衣下幌男必腰刀刀



極精巧刑無鞭朴罪不問輕重藤繫刃殺之市用  
中國古錢衡量倍于中國磁麝綺帛國人大抵三  
種西番賈胡居久者服食皆雅潔中國流寓者尚  
回回教持齋受戒曰唐人土人有名無姓尚氣好  
鬪顏色黝黑猱頭赤脚信鬼坐臥無椅榻飲食無  
匙箸啖蛇蟻虫蚓與犬同寢食不爲穢也婚男造  
女家後五日迎婦金鼓刀盾前後甚都婦裸被髮  
跣足縈嵌絲帨戴被金珠絲飾寶粧喪有水葬火  
葬犬葬惟死者所欲產金珠銀犀角象牙玳瑁青  
鹽檳榔椒香蘇木桄榔木吉貝倒掛鳥綠鳩綠鳩

紅綠白鸚鵡白鹿白猿猴  
皇明四夷考卷上

子履準校  
孫心材重校





子集

子集

四庫全書

子集



